

26. november 2015

Meeqqanut kinguaassiutitigut kanngutsaattuliortarneq ullumimut naleqqiullugu annertuumik appartinniarlugu pitsaaliuinerup nukittorsarnissaat pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Tillie Mertinussen, Demokraatit)

Meeqqanut kanngutsaatsuliortarnerup immikkut ullumernit annertunerusumik, pitsaaliuinikkut paasinaasarnikkullu nukittorsarneqarnissaannik Demokraatinit ilaasortap Tillie Martinussennip oqallinnissaq aallaavigalugu siunnersuutaannut Siumumiit ima oqaaseqaateqassaagut.

Meeraanermi atukkat inersimasutut qanoq inuuneqarnissamik annertoorujussuarmik tunngavi-liisooqataasarput. Soorlu aamma inuiaqatigiittut naleqartitat, pingaartitat tunaartallu inuiaqatigiittut ataatsimoorussaqaarluta kinaassuseqaarlutalu inooqatigiinnerput tunngavissittaraa. Meeqqanik atornerluinerit, kanngutsaatsuliorderit ajornersaraat. taamaakkaluarterli pillaasarnermi tamanna naaper-tuuttumik takuneqarsinnaanngilaq.

Qulequtaq immiini annertoorujussuarmik inuiaqatigiit tamatta akisussaassusilimmik malunniute-qartumillu iliuuseqartariaqarnitsinnik pisussaaffilerpaatigut. Meeqqat toqqissillutik inatsisitigullu pitsaasumik qularnaarneqarlutik sallitittuarneqartariaqarneri tamanit sallerpaasariaqarmat.

Ullumikkut meeqqanut inuusuttunullu suliniutit, meeqqat inuusuttullu pisinnaatitaaffimminnik ilisimaarinninnerulernerannik kinguneqartut qujanarput. Tamanna aamma meeqqat sinnerlugit oqaase qartartoqarnerup takutippaa.

Qulequttap samminerani pingaaruteqarpoq nunatsinni ajornartorsiummik qaangiiniarnitsinni suli-niutit iliuutsillu pitsaasumik kinguneqarnissaannik isumalluarnermik aamma nipeqaarluta saqqum-mertarnissaq. Neriuteqarnerummi sunniuteqaqataarusunneq ikummarissartarmagu.

Tamatigut naqissuserumavarput kanngutsaatsuliornerit akuersaanngilluinnaratsigit, meeraq meeraassaaq toqqissilluni tamatigullu saaffissaqarluni. Tamanna tamatta qularnaareqataaffigisariaqarparput.

Pingaarportaaq aamma kinguaassiutitigut atonerlugaasimagaluarlutik ullumikkut inuppassuit ajunngitsumik ingerlariaqqissimasut eqqartuinitanni puiusannginnatsigit. Taakkuupput aamma takutitsisut neriuuteqalersitsisullu artornartumik mikinerminni pineqarsimagaluarlutik inuuneq ajunngitsumik ingerlanneqarsinnaanerani takutitsisut.

Inuiaavugut meerartatsinnik asanningaartut, tamatigut ajunngitsunik atugaqarnissaannik tunngaviusumik kissaateqartut, tamannalu tamakkiisumik tamanullu qularnaarisumik atortittariaqarparput.

Taamak oqaaseqarluta oqallinnissamut soqutiginaartumut qujavugut. Oqallilluartoqarnissaannillu kissaassilluta.

Vivian Motzfeldt

Siumut